

REGIONAL NEWS

HEADLINES:-

1. Mizoram-in Lok Sabha-a seat a neih chhuna thu turin Zoram People Movement (ZPM) Candidate Pu Richard Vanlalmangaiha hneh taka thlan tlin a ni.
2. Ram dang atanga dan phal loha kuhva lak luh awm thin chungchangah Home Department chuan hmalakna thar an neih thu an sawi.
3. Lok sabha inthlan vote chhiar mek ah BJP leh a thawhpui NDA ten hma an hruai mekin sawrkarna siam turin an inpuahchah mek a ni.
4. Andhra Pradesh Assembly ah PDP leh Odisha Assembly inthlanah BJP ten sawrkar an siam dawn.

<><><>

LOK SABHA ELECTION RESULT

Mizoram-in Lok Sabha-a seat a neih chhun hnawh khah nana kumin April ni 19-a vote thlak te boruak muanawm tak hnuaiah chhiar zawh a ni ta a. State-a ro rel lai Zoram People Movement (ZPM) Candidate Pu Richard Vanlalmangaiha chu hneh taka thlan tlin a ni.

Puan tawh angin vote hi tukin dar 8 atang khan chhiar tan a ni a. Election Commission of India (ECI)-in a tarlan dan chuan Zoram People's Movement (ZPM) Candidate Pu Richard Vanlalmangaiha hian Vote Nuai 2 Sang 6 leh 377 hmuin thlan tlin a ni a. Amah hnaih bertu MNF Candidate Pu K. Vanlalvena'n Vote Nuai 1 Sing 3 Sang 9 leh 532 hmuin an inthlauhna hi vote 66,845 a ni.

Indian National Congress (INC) Candidate Pu Lalbiakzama'n vote 97,761 a hmu a; Bhratya Janata party (BJP) candidate Pu Vanlalhmuaka'n vote 33,009 a hmu a, Mizoram People's Conference (MPC) candidate Rita Malsawmin' vote 3681 hmuin Independent Candidate Pu Lalhriatrenga Changte in vote 4663 a hmu a, thlan tur bik hre lo mi 1,866-in NOTA an hmet a ni.

Lok Sabha MP atana thlan tlin ZPM Candidate Pu Richard Vanlalmangaiha'n a beisei aiin vote a hmu tam, a ti a. Vote inthlauhna sang taka thlan tlin a ni chu mipuiten ZPM Sawrkar Pu Lalduhoma kaihhruai an rin zia tilangtu, a ni a ti.

Akashvani Palai nen an inkawmnaah he thu hi sawiin Pu Richard Vanlalmangaiha chuan vote sing 2 vela chak a lo inbeisei laia vote sing 7 dawn laia hnehna a chang chu lawmawm a tih thu a sawi a, mipuiten sawrkar kal lai mek chungah rinna an nghat tih lantirna a ni, a ti a. Hmasawna hrang hrang thawk tura a lo intiam angin theihtawp a chhuah chhonzawm dawn tih sawiin, sawrkar aiawh tur a nih angin Mizoram sorkar chu tha taka thawhpui tur a nih avangin sawrkar laipui lama project theh luh tawhte bawhzui chu a hmalakna hmasa a ni ang, a ti.

Pu Richard Vanlalmangaiha chuan sawrkar laipui chu a thu azira an thlawp tur thu sawiin zawm bik an nei dawn lo, a ti a. Mizoram tana tha turah chuan a rem dan danin thawhpui an tum dawn a ni, a ti bawk.

<><><>

PARTY LEADERS' REACTION TO LS ELECTION RESULT

Chief Minister Pu Lalduhoma'n an party candidate Pu Richard Vanlalmangaiha'n mipui duhsakna dawnga thlan tlin a ni chu lawmawm a tih thu sawiin mipuiten an chungah rinna an nghahzia lantirna a ni, a ti.

He thu hi Vantlang Auhmun-ah sawiin ZPM Leader Pu Lalduhoma chuan Mizoram mipuiin party naupang tē an ni chungin state-ah sawrkarna an chantir

a; MP thlengin an vote tling chu lawmawm a tih thu a sawi a. Mizo mipuite'n an chungah rinna an nghahzia lantirna a ni, a ti a. An beiseina tihlawhtling turin theihtawp an chhuah dawn tih a sawi.

MNF President Pu Zoramthanga chuan tun hma inthlan thlirin state-a rorel lai ZPM chu an party that vang ni loin a thli a tleh fuh rih a ni, a ti a. MNF-in vote Nuai chuang lai an hmu chu lawmawm a tih thu sawiin MP inthlan dang anga opposition tangrual ni se chak thei dinhmunah an ding, a ti a. Inthlan result-ah an lawm tih a sawi.

Pu Zoramthanga chuan inthlan lo awm zel tur thlirin MNF-in hma an sawn zel a beiseiawm, a ti a. State inthlanpui ni lo, AMC leh Local Council bakah VC inthlan te leh Autonomous District inthlan lo awm tur te chu ruling tan pawh chetsual awl tak a nih avangin eptu party tan pawh beiseina a awm a ni, a ti.

Congress President Pu Lal Thanzara chuan an candidate Pu Lalbiakzama vote-tu zawng zawng chungah lawmthu a sawi a; state inthlanah vote tam tak an hmuh bakah Central dinhmun thlirin an party-in nasa takin hma an sawn, a ti a. Mizoram Congress chuan Mizo hnam leh sakhua a him zel nan theihtawp a chhuah zel dawn, a ti.

BJP Mizoram President, Lok Sabha Candidate Pu Vanlalhmuaka'n campaign hun reilotea vote sang tak a hmu chu lawmawm a tih thu a sawi a; Mizo mipuiah BJP-in hma a sawn zel tih sawiin inthlan lo awm leh zel turah beiseina sang tak an nei tih a sawi.

Akashvani palai nen an inkawmnaah he thu hi sawiin Pu Vanlalhmuaka chuan Central-ah an sawrkar chu a lawmawm a, Mizo mipuiah BJP-in hma a sawn zel chuan inthlan lo awm zel turah phurna a pe tih a sawi a. ZPM Candidate Lok Sabha MP atana thlan tlin Pu Richard Vanlalhmangaiha a lawmpui thu leh mipuiten duh taka an thlan avangin a chungah beiseina a sang hle a, Mizoram tana hmasawanna hna thawk turin a duh tih a sawi.

ZPM-in a thu azira sawrkar laipuaia awn lam nei loa an insawi chungchangah Pu Vanlalhmuaka chuan a laiah a awm theih loh, a ti a. NDA lama an awm loh chuan INDIA an ni nghal tih sawiin tan lam nei lo anga an insawi chu mipui bumna mai a ni, a ti.

<><><>

HOME DEPT. NOTIFICATION ON ARECANUT

Ram dang atanga dan phal loha kuhva lak luh a awm thin avangin Mizorama kuhva chingtuten an kuhva thar chhuah hralh kawngah harsatna an tawk tih hria-in Home Department chuan hmalakna thar a nei a.

Kuhva rahte hi Mizoram chhunga thar ngei a ni tih tichiangtu atan kuhva ching tamna district - Aizawl, Kolasib leh Mamit-ah te Certifying Officer ruat an nih thu thla hlui ni 27 khan tihchhuah a ni a. He hriattirna tihchhuahah hian Certificate of Origin pek chhuah dan tur leh he Certificate hman dan tur hi tarlan a ni a.

Certificate dilna hi kuhva rah chingtuten anmahni chinna hmun huamtu Certifying Officer-te hnenah theih tur a ni a. Certifying Officer leh staff ten dilna an dawn atanga hun remchang hmasa berah a hmunah, kuhva chingtu awm lai ngeiin an endik tur a ni a. Certificate an pekchhuahte hi vawikhat hralhchhuahna atan chauha hman theih a ni a. Certificate of Origin nei lo kuhva rah phurhte chu ram pawn atanga lak luh anga ngaih tur a ni ang a, man theih a ni ang. Certificate-te hi a dik loa hman a awm tih hriat a nih chuan certificate neitu chu criminal case siamsak theih a ni bawh ang.

<><><>

AMC ELECTION CANDIDATES

Aizawl Municipal Corporation (AMC) Ward 19-na Corporator tur thlanna tun thla ni 25-a neih tur chuh turin MNF party Nomination Committee chuan Dr. Lalrinzuali Hrahse, Aizawl Kulikawn veng chu an ruat.

ZPM chuan AMC Ward 19-na inthlan chuh tur hian an party candidate atan Dr. C. Malsawmtluangi, Hlimen veng an ruat tih nimin khan an lo puang tawh a. Congress leh BJP te pawhin candidate neih an tum tih kan Corr. an hrilh a ni.

He inthlanah hian chuh tum te tan Municipal Returning Officer (Addl. DC Office, Aizawl)-ah naktip, June ni 6 chawhma dar 11 leh chawhnu dar 3 inkarah Nomination Paper thehluh theih a ni a. Nomination form pawh he office atanga vek hian lakchhuah theih a ni a. Nomination paper te hi June ni 7-ah endik a ni ang a, inhnukdawkh duh tan June ni 10 chawhnu dar 1 thleng hun hawn a ni.

Aizawl Municipal Corporation Ward 19-ah hian Tlangnuam, Tlangnuam Vengthar, Kulikawn, Saikhamakawn, Melthum leh Hlimen te an awm.

<><><>

VOTE COUNTING

Lok sabha inthlan vote chhiar mek ah BJP leh a thawhpui NDA ten hma an hruai mekin sawrkarna siam turin an inpuahchah mek a ni. Hriat theih chinah BJP kaihhruai NDA ten seat an lak tawh leh hma an hruaina hi avaiin 292 a ni a, Hetihlai hian Congress leh an tanrualpui INDIA bloc ten hma an hruaina leh seat an lak tawh hi bial 229 a ni a, bial 18 ah party dangin hma an hruai bawh a ni.

Party malin BJP te hmahruaina leh seat an lak tawh belhkhawm hi bial 240 a ni a, Congress chuan dawtin bial 98,. Samajwadi Party in seat 38, TMC in 29, DMK 22, TDP 16, Shiv Sena (UBT) 10, JD (U) 12 ah te hma an hruai a ni.

Candidate langsar hma hruai mek zingah Prime Minister leh BJP leader Narendra Modia'n Varanasi ah hma a hruai a, Congress leader Rahul Gandhia chuan Rai Bareli leh Wayanand ah hma a hruai a,

Party hruaitu an khingpuite um mek zingah BJP leader Smriti Irani Union Minister L. Murugan leh V. Muraleedharan, Dr. Tamilisai Soundararajan leh National Conference candidate Omar Abdullah te an ni.

<><><>

ASSEMBLY

Andhra Pradesh Asembly bial 173 inthlan vote chhiar mekah Telegu Desam Party TDP ten hnehna an chan tawh leh hma an hruaina belhkhawm hi 130 a ni a, YSRCP in seat 19 ah hma hruaiin Janasena Party in 19 ah leh BJP in seat 7 ah hma an hruai a. Telugu Desam Party Chief leh Andhra Pradesh Chief Minister hlui N. Chandrababu Naidu chuan Kuppam Assembly constituency hma a hruai a. YSRCP candidate leh Chief Minister YS Jagan Mohan Reddy'n Pulivendula Assembly seat ah hma a hruai bawh a ni.

Hetihalai hian Odisha ah Assembly bial 147 ah BJP in seat an lak tawh leh hma an hruaina hi 71 a ni a, sawrkar lai Biju Janata Dal (BJD) in seat 61 ah hma an hruai thung a. Congress in bial 13 ah hmahruaiin Independent in bial 2 ah leh CPI (M) in seat khatah hma an hruai a ni.

<><><>